

इवनिंग डोगरी न्यूज बुलेटिन

समे .18:15 Hrs

<><><><><><>

Headlines

1. भारती अंतरिक्ष जातरी शुभांशु शुक्ला ते एक्सओम-फोर मिशन दे बाकी त्रै मिम्बर अंतरराष्ट्री अंतरिक्ष स्टेशन पर अपने 18एं दिनें दे मिशन दे बाद अज्ज दपैहरी धरतै पर वापस पुज्जी गे न।
2. मुखमंत्री उमर अब्दुल्ला होरें केंद्र शासित प्रदेश च लोकें गी हर बुनियादी ढांचागत सुविधां ते सेवां उपलब्ध कराने दी सरकार दे धेड़यै गी फी पक्का कीता ऐ।
3. डोडा च इक टैम्पू दे खड्डै च जाई पौने कारण 5 जनें दी मौत, 19 जख्मीं।
4. इक जिला इक उत्पाद सम्मान 2024 च जम्मू-कश्मीर गी उप्परोतली दुई बारी पैहली थाहर हासल होआ ऐ।
5. उत्तरी रेलवे नै 26 अगस्त थमां जम्मू तिव साबरमती एक्सप्रेस दे चलने दा समें नमें सिरेआ तैय कीता ऐ।

<><><><><><>

Axiom-4

भारती अंतरिक्ष जातरी शुभांशु शुक्ला ते एक्सओम-फोर मिशन दे बाकी त्रै अंतरिक्ष जातरी अंतरराष्ट्री अंतरिक्ष स्टेशन पर अपने 18 दिनें दे ऐतिहासिक मिशन दे बाद अज्ज सुरक्षित धरतै पर पुज्जी गे न। स्पेक्स ड्रैगन अंतरिक्षयान अज्ज दपैहरी अमरीका दे कैलीफोरनिया दे सैन डिएगो तट कोला दूर प्रशांत महासागर च उतरेआ। राष्ट्रपति द्रोपति मुर्मू ते प्रधानमंत्री नरेंद्र मोदी होरें उन्दे सुरक्षित ते कामयाब दौरै दी सराहना करदे होई आखेआ जे एह कामयाबी भारत दे अपने मानव अंतरिक्ष मिशन गगनयान आहली बक्खी मुल्खै दा इक सकारात्मक कदम ऐ। इस ऐतिहासिक मौके पर केंद्र विज्ञान टेकनालजी ते अंतरिक्ष विज्ञान मंत्री डॉ. जितेंद्र सिंह होरें आखेआ।

<><><><><><>

CM-Infrastructure

मुखमंत्री उमर अब्दुल्ला होरें अज्ज आखेआ ऐ जे आम लोकें दिएं चिंताएं गी दूर करना ते चुनां कोला पैहले उन्दे कन्नै कीते गेदे वायदें गी पूरा करना मजूदा सरकार दी प्राथमिकता ऐ। उनें अज्ज श्रीनगर दे बरजुला च हड्डिएं ते जोड़ें सरबंधी अस्पताल च 120 बिस्तरें दी छमता आहले आर्थोपैडिक ब्लॉक दा उदघाटन करदे होई एह गल्ल आक्खी। उनें लोकें दिएं दिक्कतें-परेशानिएं गी दूर करने दे सरकार दे धेड़ए गी पक्का करदे होई श्रीनगर च बरखा कारण पानी किट्ठा होने दी समस्या दा तौले हल करने दा मौके

पर गै निर्देश जारी कीता। उनें आखेआ जे लोकें गी म्यारी सार्वजनिक सुविधां सेवां उपलब्ध कराना सरकार दी पैहली तरजीह ऐ।

<><><><><><>

Accident-Doda

डोडा जिले च पेश आए दे इक शिड़क हादसे च 5एं लोकें दी मौत होई गई ते 19 लोक जखमी होई गे न। एह हादसा उसलै पेश आया जिसलै इक गड्डी जेहदे च 24 लोक सोआर हे शिड़क थमां रूल्कियै हेठ इंहगी खड्डे च जाई पेई। मकामी पुलस ते स्वयंसेविएं आस्सेआ फौरी तौर पर राहत ते बचाह अभियान चलाया गोआ, जेहडे राहत ते बचाह कम्में पर तक्क रखा'रदे न। हादसे दे कारण दा पता लाने लेई जांच शुरू कीती गई ऐ। केंद्री मंत्री डॉ. जितेंद्र सिंह, उपराज्यपाल मनोज सिन्हा ते मुखमंत्री उमर अब्दुल्ला होरें शिड़क हादसे च होई दी मौतें पर बसोस जाहिर कीता ते जखिमयें दे तौले नरोए होने दी कामना कीती ऐ। इस बारै होर जानकारी दिंदे होई डोडा दे डिप्टी कमिशनर हरविंदर सिंह होरें आखेआ।

<><><><><><>

GoC-Fwd Brigades

व्हाईट नाईट कोर दे जीओसी लैफ्टिनेंट जनरल पी.के.मिश्रा होरें केन्द्र शासत प्रदेशें दे केईं सारी अगेत्री इकाइएं दा दौरा लाया। इस दरान उनें कारवाइएं तैआरिं ते मौसम स्थिति दा जायजा लैता। आकाशवाणी जम्मू संवाददाता दी रिपोर्ट मूजब जीओसी हुंदे कन्ने ऐस ऑफ स्पेड्स, जीओसी ते क्रास्ट स्वार्डस डिवीजन दे जीओसी होर बी मजूद हे। इस दरान उनें उत्थें तैनात बलें कन्ने गल्लबात कीती ते पैदा होई सकने आली कुसै बी चुनौती कन्ने निबडने लेई तैआर रौहने लेई आखेआ।

<><><><><><>

Capt. Passed Away

वीर चक्र कन्ने सम्मानित आनररी कैप्टन संतन सिंह हुंदा कल काल होई गोआ। उन्दी मौती पर दुख प्रगट करदे होई मेजर जनरल रिटायर्ड गोवर्धन सिंह जम्वाल होरें 1947 कोला लेइयै हुनै तगर दे अपने चेतें गी सांझा करदे होई दस्सेआ जे कैप्टन संतन उस टीम च शामिल हे, जिन्नै 1947 च मकबूजा कश्मीर थमां जान बचाइए आए दे रिफ्यूजिएं दी मदद कीती ते मगरा उनेंगी सुरक्षित जम्मू पजाया। मेजर जनरल जम्वाल होरें आखेआ।

<><><><><><>

JK-ODOP

इक जिला इक उत्पाद आहले राश्ट्री सम्मान 2024 च राज्यें दी श्रेणी च जम्मू-कश्मीर गी उप्परोतली दुए बरे पैहली थाहर हासल होई ऐ। जम्मू-कश्मीर गी एह सम्मान इक जिला इक उत्पाद आहली पैहल च ओहदे महत्वपूर्ण जोगदान ते शानदार कारकरदगी लेई दिता गोआ ऐ। एह अवार्ड उद्योग ते बपार मैहकमे दे कमिशनर सैकरेटरी विक्रमजीत सिंह ते जम्मू-कश्मीर ट्रेड प्रमोशन आर्गनाइजेशन JKTPO दे प्रबंध निदेशक सुदर्शन कुमार होरें हासल कीता। एह सम्मान समारोह नमीं दिल्ली दे भारत मंडपम च आयोजित कीता गोदा हा। केंद्री मंत्री पीयूष गोयल होरें जम्मू-कश्मीर सने होरनें सारे जेतुएं गी ममारकबाद दिंदे होई उनेंगी होर बेहतर करने लेई शुभकामनां दितियां।

<><><><><><>

Train-Timings

उत्तर रेलवे नै ट्रेन नंबर 19224 जम्मू तवी-साबरमती एक्सप्रेस दे समें च संशोधन दी घोशणा कीती ऐ। नमां संशोधित समां 26 अगस्त 2025 थमां लागू होग। जात्रियें गी सलाह दिती जंदी ऐ जे ओह अपनी जातरा दी योजना बनाने शा पैहलें बदले गेदे समें दी जांच-पड़ताल करी लैन। उत्तर रेलवे नै सब्भनें सरबंधत लोकें गी बदलाएं पर ध्यान देने ते ओहदे मताबक सहयोग करने दा आग्रह कीता ऐ। विस्तृत जानकारी आस्तै जातरी आधिकारिक उत्तर रेलवे दे एक्स हैंडल दे कन्नोकन्नी आकाशवाणी समाचार जम्मू दे सोशल मीडिया हैंडल पर जाई सकदे न। जात्रियें आस्तै बेहतर संपर्क जकीनी बनाने आस्तै एह फैसला लैता गोआ ऐ।

<><><><><><>

Yatra-cameras

इस्सलै चला'रदी श्री अमरनाथ जातरा दरान रामबन जिला प्रशासन नै नाशरी थमां बनिहाल तगर सब्बै लंगर आहली थाहरें, रौहने-बौहने आहली थाहरें ते जम्मू-श्रीनगर राश्ट्री जरनैली शिड़क (एन.एच-44) गी सी.सी.टी.वी कैमरें दी निगरानी च रक्खेआ ऐ। लंगर आहली थाहरें आस्तै सी.सी.टी.वी कैमरे लाना लाजमी ऐ ते तीर्थ जात्रियें दी मदाद आस्तै हेल्पलाइन नंबर 01998-295500 ते 01998-262790 दे कन्नै इक कंट्रोल रूम स्थापित कीता गोआ ऐ। रामबन दे SSP कुलबीर सिंह हुंदे कोला होर जानकारी।

<><><><><><>

SWD-Ramban

समाज कल्याण विभाग बक्ख-बक्ख योजनाएं तैहत दिव्यांगजनें गी बनावटी अंग ते सहायक उपकरण उपलब्ध करोआने लेई अग्गे आया ऐ। मैहकमा दिव्यांगजनें लेई बनाई गेदी ADIP ते Prosthetic Aid योजना च त्रै पहिएं आहली साइकिल, व्हील चेयर, कृत्रिम अंग ते होर सहायक उपकरण दिंदा ऐ तां जे

ओह होर असानी कन्नै जीवन यापन करी सकन। मैहकमे नै जरूरतमंदें दी मदद लेई रामबन जिले दी केई थाहरें पर कैंप लाना शुरू करी दिता ऐ। जिला समाज कल्याण अधिकारी तारिक काजी होरें इस बारे होर जानकारी दिंदे होई आखेआ।

<><><><><><>